

■ TRIBUNA POLITICA

En noss interess

DA SILVA SEMADENI,
CUSSEGLIERA NAZIUNALA PS

Propi dis d'atun mirveglius avain nus giudi en questas davosas emnas. E spezialmain bel era quai en las muntognas – in tschiel cler, colurs gliscentas, in zichel naiv sin la pizza. Localmain ins ha registrà temperatures da record per il november, il cunfin da nulla grads anc sin 4000 meters sur mar. Era la stad passada haja dà temperatures da record. La stad 2015 vala uschia sco la segund chauda en l'istorgia da 152 onns mesiraziuns da temperatures en Svizra.

Las mesiraziuns mussan: Dapi l'industrialisaziun en il 19avel tshientaner è s'augmentada la temperatura media sin terra per 0,8 grads, en Svizra schizunt per 1,7 grads. Eveniments da l'aura sco plievias intensivas u dis da chalira sur 35 grads creschan. Quest svilup stuess far quitads. Tals eveniments da l'aura han grondas consequenzas e custan blers raps. Gist en las regiuns da muntogna ins vegn a registrar en l'avegnir dapli donnas causa il luar da la schelira permanente e dals glatschers. Rempars cunter crappa, bovas ed inundaziuns u investiziuns en indrizs per producir naiv en territoris da skis èn chars. E betg mo glatschers e spundas, era cuntradas agriculas e gauds èn smanatschads



causa las midadas dal clima e da l'aura. La confederaziun vul impunder ulteriurs 10 milliuns francs ad onn per rinforzar ils gauds da protecziun en las regiuns da muntogna. Il pli nov rapport dal cussegl dal clima mussa che las temperatures s'augmentan anc dapli. Senza ina reducziun dal CO2 sin l'entir mund vegn quai ad esser per las generaziuns futuras main pacific ed adina pli char, surtut era tar nus.

Pudain nus cuntinuar ad ignorar questas sfidas sco che fan quai las partidas da dretga? Jau manegel na. Nus producim dapli CO2 che quai che nus dain tiers. Sche nus resguardassan era la producziun da las emissiuns che sa cumuleschan tar products e prestaziuns importads en noss pajais, lura è l'expulsiun da substanzas nuschaivlas per mintga persuna svizra en la media europeana. Perquai sto reducir la Svizra sias emissiuns almain uschè

ferm sco l'UE. La strategia d'energia 2050 è en quest context ina resposta impurtanta dal cussegl federal e dal parlament. Ella è anc en la procedura d'eliminaziun da las differenzas e vegn terminada la primavaira 2016 – speranza senza ulteriurs pegiuraments.

En occasiun da la conferenza dal clima proxim december a Paris ins discuta la protecziun internaziunala dal clima. La cunvegna vul obligar tut ils pajais. Quels industrialisads duain però pagar als pajais da svilup latiers ina contribuziun per finanzia las mesiras da protecziun dal clima. Auter sco tar l'inscunter per il clima 2009 a Kopenhagen pari ch'ils pajais vulan decider a Paris questa giada mesiras liantas. Ma, vegn quest nov contract a pudair limitar il stgudament dal clima? Probablmain betg. Mesiras per il clima pli severas vegnan ad esser necessarias era sunter l'inscunter da Paris. «La Svizra vegn a resentir la midada dal clima spezialmain bain e vegn ad esser dependenta fermamain dal cuntegn da la cunvegna da Paris. La Svizra vegn a defender uschia primarmain ses agens interess», scriva l'uffizi per ambient. Quai è en urden, igl è en l'interess da nus tuts che la raschun ecologica naziunala ed internaziunala sa fa valair.